

Vischnanca alemana en il chantun Giura

Il president rapporta

DA GUIU SOBIELA-CAANITZ

■ En ils davos decennis dal tschientaner passà ha il chantun Berna pers parts da l'antier principadi episcopal da Basilea separadas da la Frantscha il 1815. Il chantun Giura è nashì 1979 cun las citads da Delémont e Porrentruy, e Basilea-Champagna ha survegnì 1994 la vallada da Laufen.

Il referendum dals 18 da zercladur 2017 a Moutier/BE duai «mo» gidar a fixar in toc cunfin tranter ils chantuns Berna e Giura. Tranter quest davos e

Basilea-Champagna han ins stabilì il cunfin gia en ils ons novanta, surlaschond al chantun Giura il district romand da Delémont. Quest cumpiglia encunter nordost las vischnancas d'Ederswiler, Movelier e Soyhières; oz è Ederswiler, cun 113 olmas il 2015, l'unica vischnanca alemana dal chantun Giura. Co statti oz cun lezza minoritad? La gasetta «Le Jura Libre» (Moutier) ha publictà ils 9 da zercladur ina brev da Pascal Willemin, president communal d'Ederswiler, intitulada: «Confiance dans le Jura». I suonda la

quintessenza da ses pleds: «Ina clera maioritad da la gliud d'Ederswiler leva restar bernaisa (...). Ma la vischnanca ha acceptà la decisiun democratica dal district senza problem. Oz essan nus burgais da la 'république et canton du Jura' (...). Jau crai d'astgar dir ch'Ederswiler sa senta bain en il Giura, nua ch'ins respecta tuttafatg nossa vischnanca germanofona. Noss uffants frequentan la scola da Movelier [391 olmas]; i èn bilings e ventiraivels da quai. L'administraziun chantunala resguarda e levgescha zunt l'atgnadad alemana

d'Ederswiler. Il chantun Giura maina classas bilinguas e matura bilingua en ils gimnasis da Laufen e Porrentruy; el è in bun exempel d'offerta per emprennder tudestg.» La medema pagina 8 da «Le Jura Libre» cuntegna ina brev da Heinz Aebi, antier president communal da Nenzlingen/BL en la vallada da Laufen pli baud bernaisa: «Grazia a la midada da chantun è la populaziun da la vallada ferm creschida; il cunfin tranter Blauerberg ed Angelstein è svanì, per bleras famiglias ha quai levgià da vegnir a star en la regiun.»